

Timor-Leste Ministry of Finance

Governu Submete ba PN Proposta Lei OJE 2022 ho montante billaun \$1,675 – hetan redusaun 17,5% kompara ho OJE Retifikativu 2021



Díli, 15 outubru 2021 – Ministru Asuntu Parlamentár no Komunikasaun Sosiál, Francisco Jerónimo akompaña husi Ministru Finansas, Rui A. Gomes, ohin dadeer, aprezena ona ba Parlamentu Nasionál, Proposta Lei Orsamentu Jerál Estadu (OJE) 2022 ho montante total billaun \$1,675. Montante ne'e hetan redusaun 17,5% kompara ho alokasaun orsamentu final 2021.

Proposta Lei OJE 2022 ho montante aprovalu billaun \$1,675 sei uza hodi finansia Programas 45 liuhusi prioridade nasional neen (6) ho objetivu atu atinji dezvoltimentu ida ne'ebé kualidade ho kresimentu ekonómiku ne'ebé inkluzivu no sustentável.

Programa ho orsamentu boot liu iha 2022 mak Boa Governasaun no Jestaun Institusionál ne'ebé nia objetivu atu sustenta mákina Estadu ho orsamentu total kuaze millaun \$295, tuir kedan ho Igualdade Jéneru no Inkluziun Sosiál millaun \$203,78. Estrada no Pontes hanesan Programa ne'ebé tuur iha pozisaun terseira ho total orsamentu alokadu kuaze millaun \$202. Programa Saúde ho orsamentu alokadu millaun \$106,78; Edukasaun no Formasaun millaun \$105,87 no Eletrisidade millaun \$101,73.

Alokasaun OJE 2022 tuir prioridades nasional 6 aas liu mak iha Setór Produtivu sira (Agrikultura no Turizmu), Ambiente no Konektividade ho alokasaun 27%. Tuir kedan ho Abitasaun no Inkluziun Sosiál 22%, Boa Governasaun 12%, Dezvoltimentu Kapital Umanu 10%, Dezvoltimentu Rural 3% no Dezvoltimentu Setór Privadu 0,5%. Aleinde ne'e, ba funsionamentu mákina Estadu hetan alokasaun 18% no atividade seluk 8%.



Alokasaun **Proposta OJE 2022** tuir klasifikasaun ekonómiku aas liu mak iha Transférensia Públiku ho montante millaun \$565,9. Tuir kedan ho Bens no Servisus millaun \$449,8. Kapitál Dezenvolvimentu hetan alokasaun millaun \$401,7. Saláriu no Vensimentu millaun \$233 no Kapitál Menór millaun \$24,4.

Medidas foun sira ne'ebé mak sei inklui iha **Proposta OJE 2022** mak hanesan: i) Subsídium Ai-han ba funsionáriu públiku ho orsamentu alokadu millaun \$25; ii) Fundu Resposta Emerjénsia hasoru dezastre naturál ho orsamentu alokadu millaun \$15; iii) Fundu Investimentu hodi estabese Munisípiu foun Ataúro ho orsamentu alokadu millaun \$13; iv) *Bolsa da Mae* Jersaun Foun ho orsamentu alokadu millaun \$13 (montante ne'e la-inklui millaun \$6,4 husi Governu Austrália liuhusi Apoiu Orsamentu Diretu); v) Eleisaun Prezidensiál 2022 ho orsamentu alokadu millaun \$12; vi) Dezenvolvimentu Empreza Média Ki'ik ho orsamentu alokadu millaun \$5; vii) Akizisaun veikulu no ekipamentu ba *Bombeiros* hodi responde ba dezastre ho orsamentu alokadu millaun \$3,9; viii) Sensus Populasaun ho orsamentu alokadu millaun \$3,1; ix) Estabesimentu sistema ID Úniku ho orsamentu alokadu millaun \$3 no x) Saláriu ba rekrutamentu foun F-FDTL ema 1,200 ho orsamentu alokadu millaun \$1,2.

Timor-Leste ninia Planu Estratéjiku Dezenvolvimentu Nasionál (PEDN) 2011-2030 organizadu liuhusi pilár importante haat: Enkuadramentu Institusionál, Kapitál Sosiál, Dezenvolvimentu Ekonómiku no Dezenvolvimentu Infraestrutúra. Bazeia ba pilár importante 4 ne'e, Oitavu Governu Konstitusionál defini área prioridades 6 ba tinan oin mak hanesan: i) Dezenvolvimentu Kapitál Umanu; ii) Abitasaun no Inkluzsaun Sosiál; iii) Setór Produtivu, Ambiente no Konektividade; iv) Dezenvolvimentu Setór Privadu no Kooperativa; v) Dezenvolvimentu Rurál; no vi) Boa Governasaun. ***